



## BEINVEGNI

Gl'onn niev ei aunc giuvens e buffa frestgmein en fatscha a nus. Jeu sperel che Vus hagian fatg in bien segl el 2024 ed jeu prendel la caschun da giavischar a Vus – bein in tec tard mo tuttina da cor – tut il bien pils endisch meins che suondan. Tgi sa, forsa dat quei onn aunc empau slontsch d'empruar enzatgei niev. Vus savevas probablamein ch'ins sa dar rudialas a Laax? Mo savevas vus era ch'ins sa saltar «Line Dance»? Quei ein mo duas activitads dil temps liber ch'ins sa scuvrir en nosa biala vischnaunca. Denton forsa haveis Vus era gust da s'engaschar pil beinesser da nies vitg e pondereis da candidar per in ufeci politic? Uonn ein elecziuns communalas e nus havessen grond plascher da habitontas e habitonts cun habilitads e motivaziun da formar e svilupper nosa vischnaunca. Il medem vala era per la fundaziun Pro Laax che sto remplazzar uonn gest treis commembers dil cussegl. Jeu hai marveglias e selegrel da quei ch'igl onn 2024 vegn a purtar ils proxims meins. Lein ir commuablamein tras quei onn e cun engaschi, curascha pil niev, slontsch e vent frestg.

*Franz Gschwend, president communal*



Dieser Link führt Sie zu den Novas da Laax in Deutsch und Rätoromanisch.

## IMPRESSUM:

Novas da Laax, vischnaunca da Laax  
Cumpara: mintga 2 meins, alla fin dil meins  
Proxima ediziun: 29 da mars 2024  
Ideas per tematicas: tochen ils 15 da mars 2024  
Redacziun: Domenica Flütsch  
Contact: admin@laax-gr.ch



Legenda: Precisiun, plascher e spért da team.

# TRER RUDIALAS A LAAX

Silla piazza da patinar al Lag Grond vegn tratg rudialas, mintga margis sera e gest tenor l'aura. Quella disciplina sportiva ei da cumparegliar cul curling. Giugaduras e giugadurs emprovan da plazzar lur rudialas schi datier sco pusseivel dalla «casa». Quella ei da tshella vart digl iral dil glatsch. Il giug dattan ins en gruppas da quater, cun rudialas, ina spezia da schibas da metal cun moni ch'ins fiera – sco menziunau semegliont a curling – sur gl'iral dil giug. Interessents ein envidai cordialmein d'empruar quell'activitad interessanta e captivonta. Era entscheviders ein beinvegini. Las reglas emprend'ins cun dar ed il material san ins empristar el liug cun pagar ina taxa modesta da 3 francs. Indispensabel eis ei da setrer en cauld, era buns calzers. E naturalmein che la buna luna ei era beinvegnida. Ils «Amitgs glatsch da Laax» selegran d'ulteriuras giugaduras e giugadurs.





Line dancers da Laax dil program d'unviern.

## LINE DANCE A LAAX

Igl entscheiva puspei, gia la 17avla gada ei quest unviern a Laax Line Dance culla menadra Bea Koller. Igl ei gest il dretg per gliud che ha plascher da quella moda da saltar e che vul buca seser semplamein a meisa cu ei vegn intunau musica da country. Cun Line Dance vegnan ins en moviment ed ha plascher da quei. Vitier drovan ins negin partenari ni partenaria per saltar. Line Dance ei ina fuorma da saltar cun coreografia, cun participontas e participonts che saultan en retschas in sper l'auter. Ils saults ein coreografai aschia ch'els s'accordan culla musica. Il sault consista da successiuns da pass fix che serepetan. Ils saults ein fetg variants el ritmus da polca, valzer, rumba jive eav. Gl'iral da saltar ei adattaus per entscheviders sco per avanzai. Nus s'entupeiin tochen miez avrel 2024 mintga vendergis sera, allas 19.00 ils entscheviders ed allas 20.00 ils avanzai. Normalmein ei Line Dance ell'aula dalla casa da scola. Pervia dil donn d'aua ell'aula Grava essan nus ad interim ella halla da gimnastica a Falera.

**Informaziuns detagliadas survegn'ins e s'annunziar tier Bea Koller 078 796 69 72 ni Marita Buchli, 079 324 94 55**

## 2024: 50 ONNS PRO LAAX

Per festivar quei giubileum envida la Pro Laax dumengia, ils 4 d'uost, ad in solver sil Plaun dil Lag. Quei cun l'intenziun da star da cumpignia e da trer a nez quei anniversari per far patratgs davart il svilup futur da nossa vischnaunca, da nossa cuminonza dil vitg e dalla Pro Laax. Dapli davart la Pro Laax anfleis sin la pagina d'internet dalla fundaziun ni era ella agenda 2024 ch'ei vegnida repartida en tuttas casadas e ch'ins sa era retrer sin canzlia.



Club da ballapei en acziun sin tribuna

## TEATER «HOLLYWOOD IN TSCHANZ DA GUMPZ»

Ch'il Club da ballapei Laax ei enconuscents per dribblings sil plaz dil Lag Sec ei enconuscents. Ed adina pli enconuscents era pervia da sias prestaziuns silla tribuna da teater. Culla produczion «Hollywood in Tschanz da Gumpz» presenta la truppa passionada entuorn Romana Brunold era uonn puspei in toc humoristic e divertent. Ella meina aspectaturas ed aspectaturs el menaschi turistic dil pign igniv Tschanz da Gumpz», lunsch naven dil «glamour». Leu han ins grond problems: Dapi onns vegnan ils turists buca pli. Ils biars setschantan a Tschanz da Gumpz mo perquei ch'il sistem da navigaziun ha menau els silla via fallida. Cu la renomada actura da Hollywood Marilyn Masoni annunzia nunspitgadamein sia viseta, levanta ella speronzas. Plans gagliards ed ina truppa ambiziosa culla presidenta communal, l'ustiera, il scolast da skis ed il menader dils runals vegnan en febra. Denton gia s'avischinan novs desasters. Acturas ed acturs: Sina Brunold, Gerda Manning, Roman Niederberger, Mauro Togggenburg, Max Welter, Marina Welter. Reschia: Romana Brunold.

**Reservaziun da bigliets: Romana Brunold, tel. 077 202 34 93, mail: info@cblaax.ch**

## COMMUNICAZIUNS DALLA SUPRSTONZA COMMUNALA: DEMISSIUNS DA POSTS COMMUNALS

Uonn ein elecziuns communalas. Tenor artechel 12 dalla constituziun ein las demissiun d'inoltra a scret, per regla silla fin da schaner digl onn d'elecziuns.

## JEU LESS S'ENGASCHAR PER LAAX!

(ea) El cussegl da fundaziun dalla Pro Laax ein d'occupar cun primavera proxima da niev 3 posts. Il president Erwin Ardüser remetta siu uffeci suenter 9 onns, Martina Wolf-Cafilisch suenter 3 onns e muort limitaziun dil temps d'uffeci banduna Christoph Schneller il gremi suenter 12 onns. En uffeci sco commembers dil cussegl da fundaziun restan Toni Camathias e Franz Gschwend.

La Pro Laax, fundada 1974, sustegn e realisescha projects che han in connex cun la vischnaunca da Laax. El center stattan projects pli pigns e pli gronds che promovon stentas ed infrastructures culturalas da tut gener en nossa vischnaunca.

Tgi che less pia s'engaschar per la cuminonza dil vitg ei cordialmein envidaus d'annunziar siu interess per il cussegl da fundaziun alla vischnaunca ni alla Pro Laax.

[info@prolaax.ch](mailto:info@prolaax.ch)

## AGENDA

### Sonda, 3 da fevrer 2024

Exposiziun Anna-Rita Stoffel e Carl Strauss: in omagi personal.  
Avertura allas 15.30, Cularta

### Vendergis, 1 da mars 2024

Teater «Hollywood in Tschanz da Gumpz». Il CB Laax muossa ina cumedia d'unviern allas 20.00, aula casa da scola Laax  
Ulteriuras presentaziuns:  
sonda, 2-3-2024; vendergis, 8-3-2024

### Sonda, 16 da mars 2024

Exposiziun «Love At First Sight – La forza dil Street Art»  
allas 13.30, Cularta

### Mintga margis-sera

Trer rudialas  
allas 19.00, patinera Lag Grond

### Mintga vendergis-sera

Line Dance  
allas 19.00 entscheviders, 20.00, avanzai il schaner: halla da gimnastica Falera, il fevrer: aula casa da scola Laax